

Kálag echě elónténé ébε echě
Paalε áténlé
Baá Kōrinto
Ndibned n kálag

Enén kálag chó edé kálag echě elónténé ébε, echě Paalε áténlé bad bé dyad á Kōrinto áde ábédé á Masēdonia. Paalε antěl chó á pónde echě mam méekage'aá bósbe mwembé nime mbédé á Kōrinto. Bad behóg áfintē e nímē mwembé bēnhōb Paalε mekan mé mbéb á yāl, bon kénē Paalε anwōη nlém bwāmbwam aá bósβōō bétim ásē. Ade bēntimmé-'ε ásē, Paalε anwóg menyinge bwāmbwam. A kálag-tē wén, Paalε ahóbé ngáne bósbe bad bé mwembé bé Kōrinto bémβēē. Awēd-te ahóbé nzōm echě ekáá bon átelé' enén kálag ne e'yale ábe é'wúú áte tāηgene nzyāη éche ákúdé ne atyéemεn áde baahóg áfintē e mwembé bétyéémánnáá mó. Alúmté-'ε nímē menyinge ngáne nyaa echě átélé enén kálag, ébélé bad bétédte Abel dé mbéb bon bósβōō bétim-mε ásē. Acháa-'ε mwembé aá bésaa mōné ne nlém nhóg áwōηgen betóótōkē bé bad bé Krīsto ábe bēbédé á mbwóg e Judeya. A kálag-tē wē ámpē, Paalε ahóbe mekan álúmed aá móbēdē mbapεε a nlómag a mbále awē Yesu Krīstə. Ambel nén áyāle nguse é bad ébédé á Kōrinto échě éenchəg yāl bán bem-bapεε bé nlómag bé mbále ábe Krīstə, bán Paalε-'ε adé mbapεε a nlómag a metóm.

Nkabtéd n kálag

Ndibned n kálag 1.1-11

Paale ne mwembé ní dyad á Kōrinto 1.12-7.16
 Asaṅned bad bé Krīsto á mbwóg e Judeya mōné
 8.1-9.15
 Paale mbapεε a nlómag a mbále awě Krīstəə
 10.1-13.10
 Melentεn mé asóg 13.11-13

¹ Mε Paale, mbapεε a nlómag awě Yesu Krīstəə ngáne Dyōb átíídé, mε-εé ntelé enén kálag. Mε ne awεd mwānyaŋ a Krīsto, Timotiε, sélomme' nyé elad e bad bé Dyōb ábe bédé á dyad á Kōrinto ne bad bé Dyōb bésyāāl ábe bédé á mbwóg e Akaya, melentεn. ² Nsimé ne nsañ ní Dyōb Titée awêd ne Sāŋgú Yesu Krīstəə, míbê ne nyé.

Dyōb áwéde' moosyāal nlém á abum

³ Syánē déken Dyōb, Sáá awě awεd Sāŋgwéé, Yesu Krīstəə. Mó adé Titée awě awóge moosyāal ngəl, abé-'ε Dyōb áde áwéde' moosyāal nlém á abum. ⁴ Awéde' syánē nlém á abum áyāle ndutul ésyāal eche dékudεé, ábel boŋ syánē ámpē déhel bad nlém awéd á abum ábe bómpē békude nyaa e ndutul ké ehéé. Déwêd bó nlém á abum melemlem ngáne Dyōb áwédeé syánē nlém á abum. ⁵ Ngáne Krīstəə ákúdé'áá metake, née syánē ámpē dékudεé metake áyāl echê. Né-ǝó, abé áde dédíí ne Yesu Krīstəə, Dyōb déwêd syánē ámpē nlém á abum bwāmbwam. ⁶ Nzé sékude metake édíi áwéd nyé nlém á abum ne áwóngeŋ nyé ákud e soóson. Nzé sékudé e'wéd bé nlém á abum né nyémpē nyéékūd e'wéd bé nlém á abum, nyéékūd-te ngíne áwεsen melemlem mé metake ne e'kaŋ bé nlém ngáne sémpē séwéséné. ⁷ Sêsumé nlém áwēn bwāmbwam. Sébíí nén bán nzé nyékude' metake

melemlem ngáne sémpē sékudεέ, Dyōb déwēd nyé nlem á abum melemlem ngáne áwédé-’ε sé.

⁸ A-baányan, sēdāó bán nyésōnten nyaa e metake echē sékúdé á mbwóg e Esia. Metake níme sēnkudté mēndenléd sé nyaa echē sēnwēmtēnē bán séebáá á alongé. ⁹ Sēnwēmtén nén bán bébídte mbakú bán béwúu sé. Boη sékudé’áá nímén metake ábel séēsūmē’ nlem áwεd yāl, boη pen sésum wée Dyōb, mó awē apuudte bad. ¹⁰ Kénée édíí bán sēmbé á nsal ní kwééd, ansōη sé. Nzé sédé á ndutul-tē, Dyōb débē ásonj sé. Sēsumé-’ε nlem nén bán ábē ásonj sé pónde téé eche sébēē á ndutul ámpē. ¹¹ Asonj sé akānned áde nyékānnadte sé. Bad híin bēlad mekáá ákānned sé, Dyōb-pe dénaméd sé. Nén débēl bad híin bésāgnēn Dyōb asonj áde ásóó sé.

Paale ahúde eke áse

¹² Dyam áde áde ábélé sédé kúmbe. Nlem níkénlé sé á abum nén bán, abé áde séwóó á nkōnsé-te wén, tanje nyaa eche sédíí ne nyé, ne nlem níme nísáá ne nlem nhóg, ádíí nyaa eche Dyōb ábélé áá ébē. Adén abé dénkēmbáá ne debyéé á moonyonj boη démbē ne nsimé ní Dyōb. ¹³ Chōm éche sétenléé nyé édíí éche nyéhēnlé alán, nyésōntén-ne. Nsumé nlem mée nyésōntēn nímén mekan pónde ésyāāl. ¹⁴ Ngáne nyémáá donje á mekan tēngene sé asōnten, ndúbpé nén mée nyéēkonj sé asōnten bwām. Nén débēl á pónde eche Sāngú Yesue ápéé, nyéēhel ahób bán nyédé kúmbe ne sé melemlem ngáne sémpē séhēnlé ahób bán sédé kúmbe ne nyé.

15 Adúbe áde méndūbēē meé nén áde mbále mentii meé mésēbē apε áwēn ábel boη nyétombwēn ngen éche élónténé ébe. 16 Mentíi meé mǎhyě áwēn nzé nkag á mbwóg e Masedonia, mentíi-’ε ámpē meé á ehúu métyēem áwēn ábel boη nyéwōngēn με áke á mbwóg e Judeya. 17 Ade mēmbenlé mímén ntíi, énkēmbáá éche ríhelaá-se ríhəŋlén nlém á abum. Meébēlēē mímēm ntíi á nyaa e moonyoη. Meesaá néε mod awě akwentan aá, “Eε, mǎbēl.” Boη ámbid e pónde átim ahób aá, “Aáy, méebenlé.” 18 A’sō é’ Dyōb áde ábele ngáne ahóbé aá mósǎbēl, nzé séláŋgé nyé bán séēbēl dyam, sébelé sébēl-le dó. 19 Nzom echě ekáá boη nén ábe edii áyāle nkalaη mí bwām tǎηgene Mwān a Dyōb, Yesu Krístəə, míme με, Sailase ne Timotie sékánlé’áá nyé. Yesuε eehóbéé aá mósǎbēl dyam boη eétimē dó abel. Yesu Krístəə ábele dyam áde ahóbé aá mósǎbēl. 20 Chōm ésyāəl éche Dyōb ahóbé aá mósǎbēl, abelé mébenlad abel áde ábélé boη debé ne Krístəə. Nén dóo ákáá boη áyāle mekan míme Yesuε ábeléé syánē déhəbē bán, “Ebē nê” ábel boη Dyōb ákud edúbé. 21 Dyōb dóo ábélé boη syánē debé dédūbpē Krístəə. Dyōb dēn dóo áwógté syánē ábē ne Krístəə. 22 Ahédé-’ε syánē ábē e’chem ábe é’lúmtē bán syánē dedé ábē bad, ahé-’ε syánē éche Edəádəη éche Esáá á nlém-té álúmed nén bán dεékūd bwēm é’syāəl ábe ahóbé aá mósǎbē syánē.

23 Dyōb áde με mbóη nén aá chōm éche ríhóbéé édé mbále. Nzom echě enkəη boη menkēntím ámbid á dyad á Kōrinto, edii áyāle meéhede’áá meé ríwóged nyé ndutul. 24 Séēhēdēē bán ébē byánán sēnyágté nyé ádúbe kéchéé. Boη pεn sébele nsón ne nyé, ábel boη nyébē menyinje áyāle nyēsūmné

á adúbe-tê.

2

¹ Né-ǎó, memmăd á nlém-tê nén mēé mēehyaá nyé anyín ámpē. Nzé mempě nwógté'áá nyé ndutul. ² Nzé nwógté nyé ndutul, mod éebáá awě ăwōgēd mē menyinje, áyāle nwógté bad ndutul ábe bēmbē bēwógté' mē menyinje. ³ Nén dǎó dēnkǎŋ boŋ ítēlē nyé enén ndín e kálag. Mēehede'áá mēé nzé mpedé áwēn, nyé bad ábe nyēwógté' mē menyinje, nyēwóged mē ndutul. Ndúbpé nén mēé nzé ndé menyinje, né nyé moosyǎál nyēēbē menyinje. ⁴ Ntēnlé nyé enén kálag nyaa eche ítélé áyāle membé ndutul, metake mébé mē á nlém-tê, ítélé-'ε chó ne mēsod. Menkēntelée nyé chó ábel boŋ nyēwōg ndutul, boŋ mentelé nyé chó ábel nyébíi ngáne ńdǎó nyé bwāmbwam.

Paale ad bad bé Kōrinto bēlāgsen mod awě abelé mbéb

⁵ Nzé mod abelé dyam áde áwógté bad ndutul, saké áwēm dēmpen dǎó ábélé dǎó, né abelé dǎó wēε nyé moosyǎál ámpē. Boŋ ádén dyam ádíí dyam áde méēhōbēē bwāmbwam. ⁶ Nkǎgsen níme bad híin átíntē echēn bēbágé ene ndín e mod, ńkwógnédé mǎ. ⁷ Boŋ nyētǎngéné nēε nyélāgséné mǎ nyēwéd-ε mǎ nlém á abum, ábel ndutul eche ákúdé eetómtán mǎ adenled. ⁸ Né-ǎó, ncháa nyé mēé nyélúmed mǎ bán nyédíi nyēdǎó mǎ. ⁹ Nzom echē enkǎŋ boŋ ítēlē nyé enén kálag edíi ábíi nzé nyēēbēl mam mēsýāál níme ńhóbé mēé nyēbel. ¹⁰ Kénzée awě nyélāgséné, mémpē nlāgséné mǎ. Dyam áde ńlāgséné, nzé édé bán nlāgséné dǎó, né

nlagsan dō áyāl echên. Krīstəə abelē abíí-’ε aá nłágséné dō. ¹¹ Debele nê ábel bon Satanε eetómé’ syánē áte, éesaá bán syánē deebíí’ε mwane míme Satanε.

Békale nkalanj tângene melë mékǎǎlë

¹² Ade m̀pédé á dyad á Troas, ákal nkalanj mí bwám míme Krīstəə, Dyöb dēnnednéd me nzii ábel míme nsón. ¹³ Bon nlem ménkēmbáá me bwám á abum áyāle menkēntánné Titusε, mwǎnned a Krīstəə awě sūmō sēbele nsón. Né-ǎǎ, menlyágtén bó, ríkǎg-ke me á mbwóg e Masedonia.

¹⁴ Nságnan Dyöb áyāle ayǎgké abel syáā dehele’ míme nkalanj akal. Abé áde dédíí ne Krīstəə ábélé dedé nēngáne bad ábe Dyöb ákóbé bon ályágté áke dé akal nkalanj mí bwám mebwóg mésyāǎl. Dyöb ábélé bad bébyéε Yesu Krīstəə áyāle míme nkalanj míme syáā dékalé. Mmē nkalanj ríkag átínté e bad ngáne elod é bwám. ¹⁵ Elod é bwám, elod é Krīsto, chǎǎ dédíí á’sō é’ Dyöb. Nzé dekale nkalanj tângene Krīstəə, bad bésyāǎl ábe bédúbpé míme nkalanj míme dékálé, Dyöb ásoo’ ádāb alongé. Bon bad bésyāǎl ábe bédúbpé míme nkalanj, Dyöb déesoó’ é ádāb alongé. ¹⁶ Ne bad ábe bédé á nzii eché epágnédé Dyöb á yǎl, nkalanj mí bwám míme syáā dékanléé bó rídé áwāb nēngáne ebébtéd é elod éche éwúε’ bó. Abíníí-’ε ábe bédé á nzii áke wéε Dyöb nkalanj mí bwám míme syáā dékanléé bó, rídii nēngáne elod é bwám áyāle syáā delänge bó bán bēbē á alongé ne Dyöb á ngíndé ne á ngíndé. Nzé-ǎǎ adé awě ahεεε abel enén nyaa e nsón? ¹⁷ Séesaá ngáne bad ábíníí híin ábe békale eyale é Dyöb ábel bon békud nsyáñ. Ne sé séēbēlēē nê, áyāle

Dyöb álómé sé ákal nkalaŋ ní bwâm, nímê nkalaŋ sêkale' mó ne nlém nhóg abé áde sédíí mod nhóg ne Krīstəə, debíí-'ε nén bán Dyöb dóo álómé syáné ábel níme nsón.

3

Bekal bé nkalaŋ mé melě mékōōlē

¹ Nyêwémténé bán sêhóbe' mekan mé bwâm tâŋgene éched yāl ámpē-yε? Nyêwémténé bán séēβε nyé kálag ké'ε séhēd kálag áwēn, álúmed nén bán sêkwognédé ábel nsón átínté echên, ngáne bad bémpēe béβελεέ-yε? Séεβενlé nê. ² Nyêdíí sé á nlém-tê nêŋgáne kálag echě bétélé boŋ bad bésyāāl bélaā ábíi chōm éche édé áwēd-te. ³ Nyélúmte' bán nyêdíí kálag echě Krīstəə átélé boŋ álómén sé. Enén kálag eesaá kálag echě béténlé ínke boŋ edíi echě Edáádəŋ é Dyöb áde ábage alongé étélé. Bénkēntenlé enén kálag á meláa mīn, níme métánlé, boŋ bēntel chó á nlém ní baányoŋ. ⁴ Sêhóbe nén áyāle sêsumé nlém ne Dyöb abé áde sédíí ne Krīstəə. ⁵ Sé bēn séēhēlēε-sε sêhób bán séhēle-sε sébēl nímén nsón. Sé bēn séēhēlēε-sε sébēl mó. Dyöb dóo ábélé boŋ séhēl mó abel. ⁶ Abelé sêkwōgnédé ákal nímê nkalaŋ mé melě mékōōlē. Méesaá nkalaŋ áhíd mbéndé é melě mé nchun. Bad ábe behíde ene mbéndé béwág, béēbāg-kaá ne Dyöb. Nkalaŋ áhíd melě mékōōlē níme séyágtéé, rídé nén bán Dyöb ábage bad Edáádəŋ éche Esáá, éβεle-'ε bébē ne mó á ngíndé ne á ngíndé.

⁷ Βοοβ-ρῶ, Μοσεε an'yágéd bad áhíd mbéndé é Dyöb é melě mé nchun. Dyöb dēntél échén mbéndé ámīn e meláá níme métánlé boŋ áβε Μοσεε aá áyágte bad. Ade Dyöb dēmbéé Μοσεε

échê mbéndé, ambël e'só é'péné' Mosεε féréd, âlúmed bán échê mbéndé édii échē. E'só é'péné'áá Mosεε nyaa echě bad bé Israel béehēle'áá mó anων á'sō. Boη kénéε é'péné'áá bwâmbwam, nímē mwayé mêmbootéd asud mwämpin mpín. Bad ábe bēnhid melě mé nchun bēnwē, bēnkēmbáá-'áá ne Dyöb. ⁸ Né-ᶋᶋ, nzé sēyágte bad nkalan tângene Edædæη é Dyöb, Dyöb délūmēd bad nēn áá nímē nkalan rítómténé etógnén abé á alongé á bad. ⁹ Dyöb dénlūmēd áá módē ngum áde ámbεé Mosεε mbéndé. Echê mbéndé èmbël bad bēbii bán äkōgsēn bó áyāle mbéb níme bēbélé. Boη anabpé echě ngum alúmed abel áde ábélé boη sékalé' nímē nkalan níme rílūmte ngáne bad békobnadté áwe e'só. ¹⁰ Mbéndé éche Mosεε áyágté'áá bad bᶋᶋd âhíd mbéndé é Dyöb émbē etógnén. Ayáged áde séyágtéé bad bᶋᶋb bán Dyöb délagsén bó mbéb, bēbelé-'ε ngáne áhεdεé, dᶋᶋ átómténé etógnén abé. ¹¹ Kénéε édii bán Dyöb dénlūmēd ngáne ádii etógnén áde ábélé melě mé nchun, melě níme mémē á esōη é póndé, alúmté áá mótómtēnē etógnén abé abel áde ábélé melě méēkᶋᶋlē. Mmén melě méēkᶋᶋlē móᶋᶋ méhāηléné alongé á bad, mébē-'ε abé ne abé.

¹² Né-ᶋᶋ ngáne sésúmé nlém bán nkalan níme sékaléé ridé etógnén bwâmbwam, sékale mó ésebán sēbáá'. ¹³ Séēsaá nēηgáne Mosεε. Mosεε ankúdtén e'só ábel boη bad bé Israel béēnyiné ngáne e'só ábe é'péné'áá mó é'dímεé. ¹⁴ Boη bēnkēnsōηtēnné. A mbále, bootyaa ene póndé âpε chii, béehēléé asōηtén nēn bán apen áde e'só é'péné'áá Mosεε, nímē mpentéd rísúdé. Póndé ké ehéé nzé bad bēwógé mod aláá kálag e melě

mé nchun, béēsōñtānnē chōm éche béwógé. Edé nēñgáne abad ákúténé bó mewēmten. Nzé mod adé ne Krīstəə dēmpen dōo ásōñtanné. ¹⁵ A mbále, bootya ene póndé ápe chii, póndé ké ehéé echě béléáá mbéndé é Mosee, ébelé ébé byánán abad ákúténé bó nsōñten nyaa eche béehelée chōm éche béléáá' é abíi. ¹⁶ Bon nzé bó ké ahéé adúbpé Sánjú Yesue, chōm éche ébāg nēñgáne abad éche ékutan bó nsōñten ébelé éhide. ¹⁷ Bəəb-pəó, Sánjwée adii Edəədəñ. Kéhée áde Edəədəñ éche Sánjwée édíi, bad béébāgkē á mehañ-tê. ¹⁸ Syánē ábe Dyöb áhúdé abad áde dénkütēn syánē e'só, abé ádēd ábele' bad bēbíi ngáne ehúmé éche Sánjwée épédé abé. Bényíne' bán abelé syánē ngáne bad ábe bēbele ngáne Dyöb áhedéé. Edəədəñ éche Esáá éhəñlan syánē ahəñlen ne ahəñlen ábé ngáne Yesue ábel bad bényín ngáne ápédé ngíne abé. Sánjwée, mó awě adé Edəədəñ, mó abele nímén mekan.

4

Yesue alúmté syánē ngáne Dyöb ápédé abé

¹ Ngəl echě Dyöb ádíi chó ekəá bon sékalé' nímén nkalañ. Né-óó, séedonlé mekuu ámbíd ákal mó. ² Séebenlé mekan mé e'són míme bad bēbeléé á mesəəm-tê. Séédōgnēē nyé ehób é nsəl, séēhəñlan-naá eyale é Dyöb ádog nyé. Bon pen, sēyágte' bad eyale é Dyöb nyaa echě bad bésōñtānnē chó. Ngáne séyágtéé eyale é Dyöb ne nlém nhóg, mod-mod eéhēlēē-se ahób á nlém-tê aá sédoge mó. Sēbíi bán Dyöb abíi kéchéé éche sébeléé. ³ Nzé donje á bad béehēle nkalañ mí bwām míme séyágtéé asōñten, né édii wée abé bad bēedúbpeé mó.

Ngáne béédúbpēē Dyōb béebáá ne mó. ⁴ Satane, nkamlene a nkōñsé, akamlan mewēmtēn míme bad ábe béedúbpe Krístəə. Béehelée-se bésóñtēn bán nkalanj mí bwám nílúmte ngáne Krístəə ápédé etógnén abé. Krístəə adíí néē Dyōb dēn. ⁵ Nê dōo ákáo bonj séēkālē tñgene échəd yāl. Bonj sēkanle nyé bán Yesue mó adé Sāngwéé. Sēdñi bembəledē ábēn áyāl e Yesue. ⁶ Dyōb áde dénhōb aá, “E’nyínen bé ekíde é’bē wée ehíntēn énsēbēē abé,” mó abelé míme nkalanj tñgene Yesue ábē nēngáne e’nyínen bé ekíde ábe é’pene’ syánē á nlém-tē. Syánē baásyāāl ábe dedúbpe Yesue bōō Dyōb ábénlé nē. Dyōb ábélé nē ábel bonj bad bébii nén bán módé etógnén abíi áde bad bébñí’é bán Yesu Krístəə adíí néē mó.

⁷ Bonj nkalanj míme Dyōb ábágé sé ákal, nđii chōm éche étómténé etógnén abé. Sēdñi nēngáne mbeé e mōg echē chōm edíí áte. Nén ábénlédé ábel bonj bad bébii nén bán ngíne echē echabé ámñn ehúú ne Dyōb saké ne sé. ⁸ Sēkude nyaa é ndutul híin bonj séelyāgēē áwēd-te. Donje á pónde séebyéé’é dyam áde sébeléé, bonj séehóbéé nén bán Dyōb déelúmédté se chōm éche sétāngéné abel. ⁹ Bad bétagte se pónde té bonj Dyōb déetēdté sé. Bélógne sé, bonj Dyōb déekwēntánné aá béwúu sé. ¹⁰ Kéhéé áde sékagké ákal nkalanj mí bwám sēhédé á nlém-tē nén bán bad béhēde’ sé awúu ngáne bēnwū-’é Yesue, bonj bad bébii bán Yesue adé á alongé, mó-’aá ahág sé ngíne áte abé áde sédñí á alongé. ¹¹ Sēbii nén bán kénéé sédñí á alongé bōōb, sédé bēnben ne kwééd pónde té áyāle sēbenle Yesue. Nén adé ábel bonj bébii bán Yesue adé á alongé, mó-’aá ahág sé ngíne áte abé áde sédñí

á alongé. ¹² Né-ɔ́, sêkwěnténé kwééd âbel bon nyékud alongé áde déemaá’.

¹³ Sêdii melemlem ngáne mod awě ahóbé ngáne éténlédé á kálag e Dyöb nén bán “Ndúbpé wε, né-ɔ́, nkale’ tângene wε.” Melemlem ngáne ane mod ándübēē Dyöb, sémpē sêdúbpé Dyöb, sémpē sêdii sêkale-’ε tângene mó. ¹⁴ Sêbíí bán Dyöb áde ápuúdté Sánjú Yesue dépuúd-te sémpē ábē á alongé ámpē ne Yesue. Dyöb dépēén-ne sé ne nyé wéε ádíí. ¹⁵ Metake mésyāāl níme sêkudεé médii áwóngen nyé, ábel bon nzé bad híin bėwógé eyale é Dyöb, nsimé ní Dyöb mébēl békud alagsen dé mbéb, bėbüd-te mó aságnén. Nén débēl bad híin bėkené’ Dyöb.

¹⁶ Né-ɔ́, séedonlé mekuu ámbíd ákal nkalaŋ ní bwâm, kénεé édíí bán ngíne esude’ sé á yāl, kénē Dyöb áwede’ sé nlém á abum, áhāg-ke sé ngíne áte mbwε té. ¹⁷ Baá metake ábe sêkudεé bɔɔb bėesaá ábe sétagtεé nlém á abum. Sêkude metake bɔɔb bon ehúmé éche ébē ne sé échāb ámīn nyaa echē séekamténné metake níme sêkúdé á nkōŋsé wén, ébē-’ε ne sé á ngíndé ne á ngíndé. ¹⁸ Nē dɔɔ ákǎá bon séenyíné’ metake níme sêkudεé bɔɔb née dyam. Bon sēbānné nlém áyāl e bwēm ábe Dyöb ákōŋnédé sé, kénεé édíí bán séenyínéé bó. Bwēm ábe sényínéé bɔɔb é’dé dásɔ́ áyāl e esón é pónDé, bon bwēm ábe séehelée-se sennyín bɔɔb, bėbē á ngíndé ne á ngíndé.

5

Déékud yāl ékɔ́lē ádyöb

¹ Sêbíí nén bán échēd yāl éche sébééné á nkōŋsé edii née e’bem ábe sédyεε’é áte. Nzé bėpáá ábē

e'bem, sêbíí nén bán sêwóó ndáb ádyōb echē moonyon ēeloo'ē. Dyōb dōo álóo' ch́, ēbē-ε á ngíndé ne á ngíndé. ² Sêkōmad áte bōob á ebem-tē wén, sêwane áte bán ene ndáb echē ebíde' ádyōb ékútēn sé ngáne mbóté ékútanné mod. ³ Nzé sêdé ene ndáb áte, sêebáá nêngáne mod awē adé nsōb. ⁴ Abēen áde sêbééné enén yāl á nkōṣsé te wén, sêkōmad áte adenled áde nén adénlédé sé. Eesaá nén bán sêhede enén yāl e nkōṣsé ahúd, bon sêhede yāl ékōlē eche edé ádyōb, ábel enén yāl e nkōṣsé echē ewág émaa, étim yāl echē ēbē á alongé. ⁵ Dyōb dōo ábōṣséné syánē ákud nímén nhəṅlén alómmé-ε syánē échē Edəədəṅ éche Esáá álúmed nén aá adén akan débēnléd.

⁶ Né-ōó, pónde tée desume' nlém nén bán abé áde dídí ne échén yāl á nkōṣsé, deesaá hōm ahóg ne Səṅgwée. ⁷ Sêdé á alongé á nkōṣsé ne échén yāl, áyale sêdúbpé mó saké ngáne sényíneé mó. ⁸ Sêsumé nlém nén bán ábe syánē yāl ékōlē, sêhede-ε échēd yāl é nkōṣsé atēde áke débé ne Səṅgú Yesue. ⁹ Né-ōó, nímēd nlém nisyāal nítəṅgéné abé áwóged Yesue menyīṅge áyāl e kéchéé éche débēléé, ké ébé bán sêdé ne échēd yāl á nkōṣsé, ké'ε séesaá ne ch́. ¹⁰ Syánē mod tée átyēēm á nkáásé á'sō ábe Yesu Křístə epun éche ákāādtē moosyāal, təṅgene mekan níme ábélé á pónde echē ábédé á nkōṣsé. Mod té ákūd nsábe təṅgene mekan mé bwám ké'ε mé mbéb níme ábélé.

Abé á nchemten ne Dyōb

¹¹ Ngáne sêbíí bán Səṅgwée ákāād bad, sébagé-ε mó edúbé, sêwane' áte nén bán bad bésōṅten nén bán nkalan níme sékaléé nídé mbále. Dyōb ábíí nyaa é bad éche sédíí, mbíí-ε méé nyémpē

nyêbíí nyaa é bad éche sédíí, ndúbpé-'ε mεέ nyêbíí-'ε bán sêkale mbále. ¹² Séehóbéé mekan mé bwâm tâηgene éched yāl ámpē. Boη pen sêhede bán nyéwōη nzom ábέen sé kúmbe, ábel boη nyéwōη dyam áláa bad ábe bédé kúmbe áyāl e mekan níme bébeleé níme bad bényíneé, saké áyāl e mekan níme médé bó á nlém-tē. ¹³ Donje á bad béhóbe bán sêhóbe mekan néε bad ábe nló méésáa'έ áte. Nzé nê adé mbále, né Dyōb dōo sébagéé edúbé. Nzé sêhóbe mekan néε bad ábe nló nsáa' áte, né áwōηgen nyé dōo séhóbeé. ¹⁴ Edanje éche Krístaa chōo étédé sé nlém á abum ábel mekan níme sébeleé, áyāle sēmadé á nlém-tē nén bán Krístaa awédé á nló ní moosyāál. Né-óó, édé nêηgáne moosyāál áwédé. ¹⁵ Anwé á nló ní moosyāál ábel boη bad ábe bédé á alongé, alongé adáb déelūmtē bán bédé á alongé áyāl echáb dēmpen. Boη pen bédé á alongé áyāl e Krístaa, mó awé anwé, boη Dyōb ápūūd-tε mó á nló nímāb.

¹⁶ Né-óó, bootya bōob, déēnōnē mod nyaa eche moonyoη ánōneé. Kénéε édíí bán sēnōné'áá Krístaa á nyaa e moonyoη, séēnōnēē mó nê ámpē. ¹⁷ Né-óó, kénzée awé adé mod nhóg ne Krístaa, adii nhagtéd mékōōlē. Mmē mbeltéd mé nchun nsyāāl nímaá atóm awóó-'ε mbeltéd mékōōlē nsyāāl bōob. ¹⁸ Mmén mbeltéd mékōōlē nhúú ne Dyōb. Abelé syánē detimé ásē ne Krístaa, abagé-'ε syánē nsón ákale bad nén bán béhele bébê nsan ne Dyōb. ¹⁹ Chōm éche ríhóbeé édíí áyāl e kwééd echē Krístaa áwédé á awog. Dyōb ábélé bad bépédé á nchemtεn ne mó. Dyōb déētóo'áa mbéb níme bad bébéle, abagé-'ε syánē nsón ákale bad nén bán béhele bébê nsan ne Dyōb. ²⁰ Aláa áde Dyōb álāηgeé sé

mekan álaa bad sêdîi bad ábe béhóbpe Krīstæ. Sêsime nyé etúu áte á dīn á Krīstæ nén nyépe á nchemtɛn ne Dyöb. ²¹ Dyöb dêmpwěd Yesue átag áyāl e mbéb n̄syā̄l n̄ime syánē débélé. Yesue enkêmbɛnlé mbéb ké nhóg, boŋ kénê ankwɛntén atag áwɛd nló. Dyöb álágséné syánē mbéb ahóbe-’ε aá déēbēlēē mbéb ámpē melemlem ngáne mómpē ébɛlélé mbéb.

6

¹ Né-óó, sé ábe sêbele’ nsón ní Dyöb ne Dyöb, sêcháa nyé nén bán nsimé ní Dyöb n̄ime nyékudεé méēbāg ngên. ² Dyöb áhóbé ngáne éténlédé nén aá,

“Ade póndé épédé echē etāŋgéné, menwóg chōm éche nyéhóbé.

Ade epun é e’soosŋ-’ε épédé, menwōŋgén nyé.” Nyénōne’ póndé nén bōab echē etāŋgéné, eche nyétāŋgéné nsimé ní Dyöb akud. Nyénōne’, epun épédé éche nyéhεle nyékud e’soosŋ.

³ Séekáá’ε modmod nzii, ábel boŋ awusé déēnyīnnād áyāl e nsón n̄ime sêbeleé. ⁴ Boŋ pen, nēŋgáne bembaledε bé Dyöb, sêlúmte’ yāl nyaa ésyā̄l ábé bad ábe bébele’ mekan n̄ime métāŋgéné. Sêwánlé e’kanj bé nlém é’ ngine tāŋgene metake n̄ime sékudεé, tāŋgene alongé áde álenlad sé áte, ne ndutul éche étáne sé. ⁵ Sêkude mbéte, béhāg sé á mbwōg, ndun e mod empɛén epuutéd béchodé sé yāl áte, sêbele ntú ní ngine, sénāŋgé’ e’pin, sédyéé-’ε nzaa. ⁶ Sêlúmte’ ámpē bán sêdīi bembaledε bé Dyöb ábel áde sêbeleé mekan mé bwām ne e’sāj bé nlém, abε áde Dyöb ábágé sé nsōŋten ábíi alongé áde sétāŋgéné awōŋ, awɛɛn áde

séwēsanné, ne awóon áde séwónné bad bémpēe nlem mí bwâm. Edaðəŋ éche Esáá chós élyágte sé, sédəə-’ε moosyáal ne nlem nhóg. ⁷ Nkalaŋ míme sékaleé rídii nkalaŋ mí mbále, ngíne e Dyöb chós-’aá sébenladté ákal mó. Abel áde sébeléé mekan míme métəŋgéné ábélé bad béewóó’ε dyam dé mbéb ké ahóg ábán sé á yál. ⁸ Séəbē sébenlé Dyöb ké béken sé, ké’ε béekene’ sé. Ké bad béhōbē sé mekan mé mbéb áyāl ké’ε mekan mé bwâm. Bad béhōbe bán sélúmté bán sédé ndín é bad éche séesaá, boŋ sédii bad ábe séhóbé bán sédé. ⁹ Bad bébíí sé bwâm boŋ bémpēe bényíne’ sé bán sédii bad ábe béesε dyam dé abelen. Bad béwēmtan bán séebáá á alongé boŋ kénê sédii sédé á alongé. Sékude metake á mekáá mé bad boŋ kénê, béewúú’ε sé. ¹⁰ Sédé á ndutul té, boŋ kénê, séwóge menyinŋe pónde ésyāal. Kénéε édii bán séebudéé chōm awón, boŋ kénê nsón míme sébeléé mbélé bad híin bédúbpé Dyöb. Né-ós nê ábélé bébúdé bwēm awón bəəb. Kénéε séewóó’ε chōmchōm, nhən ní Dyöb rídii mímed.

¹¹ A-bad bé dyad á Kōrinto, sétēnlé nyé chōm ésyāal ésebán sékoŋnad nyé dyamdiam. Sélúmté-’ε ngáne nlem rídii sé áte áyāl echēn. ¹² Sédəə nyé, séebáá-’aá alúmed bán sédəə nyé. Nyé pen nyélúmté sé nén nyéədəə’ε sé. ¹³ Nhóbe áwēn bəəb néε ábēm bán. Nyémpē nyédəŋ sé ngáne sémpē sédəə nyé.

*Nyéəbēlé’ mekan míme bad
ábe béédúbpe Krístəə bébeléé*

¹⁴ Nyéəbág nlatén ne bad ábe béédúbpe Krístəə. Nhóbe nén áyāle bad ábe bétəŋgéné á’sō é’ Dyöb,

béewóó' é dyam abelen mekan níme e'bébtéd é bad bébeléé. E'nyínen bé e'kíde béewóó' é dyam abelen ehíntén. ¹⁵ Krístəə eewóó' é dyam abel ne Satanε. Mod awě adúbpé Krístəə eewóó' é dyam dé abelen mod awě eedúbpe. ¹⁶ Ndáb-e-Dyǒb eewóó' é dyam dé abelen ndáb echě bad bébenléé myǒb mémpēe. Nhóbe nén áyāle dedii ndáb e Dyǒb, Dyǒb áde ádé á alongé. Edé nén ngáne éténlédé bán Dyǒb áhóbé aá,

“Mébē ne ábēm bad, rídyēē-'ε áwāb.

Bébelé me nēngáne ádab Dyǒb, με-'ε métēd bó nēngáne ábēm bad.”

¹⁷ Sāngwéé alānge ábē bad aá,

“Né-ωó, nyéte de, nyéebág-ke ne bad ábe béedúbpe me.

Nyéewóó' dyam abel ne e'bébtéd é mekan níme bébeléé.

Měkǒb-pe nyé née ábēm bán.

¹⁸ Mébē nyé sáá,

nyé-'ε nyéēbē ábēm bán.

Me Dyǒb á Ngum με-εé nhóbe'.”

7

¹ A-baányan bé edənge, ngáne Dyǒb áhóbé aá módii awesyánē Sáá, syánē-'ε debé ábe bán, déte de mekan níme méwógte syánē mbinde á ekob é yǎl ne á edəádə. Syánē débε Dyǒb edúbé, déwǒn-'ε alongé áde ásáá, nē débǎl débagé Dyǒb edúbé ngáne éhednadté.

Paale adé menyinje

² Nhεde μεé nyédə. sé ne nlém rísyāal. Séēpānnē modmod, séēbēltēē modmod mbéb, séēdōgēē-'ε modmod. ³ Meehóbéé nén áhób

nyé. Mensébé nyé atele nén μεέ, sêdáo nyé bwâmbwam, ké á kwééd ké'ε á alongé, dĕbē debé mod nhóg. ⁴ Nkumne nyé ekáá á tâl. Mbééné nyé kúmbe. Nyêwédé με nlém á abum bwâmbwam nyaa echĕ rítómténé menyinĕge abé kénέε sékudεέ metake bwâmbwam.

⁵ Ade sépédé á mbwóg e Masedonia, sênkênkómέέ áte. Sékudé'áá metake nyaa ne nyaa. Bad bépentánnáá ne sé mbwóg-κε ríbé sé áte áyāle sêkám tánnáá nyé. ⁶ Boŋ Dyōb áde áwéde bad ábe béewóo e'lyóg bé nlém, nlém á abum, dénwēd syánē nlém á abum alóm áde ánlōmmē Tituse áwesyánē. ⁷ Saá-kaá échē eπε chēmpen êmbel sêwóg menyinĕge, boŋ awéd áde nyénwēdtē mó nlém á abum dénwōgēd sé menyinĕge. Anláá sé ngáne nyédáá με anyín bwâmbwam, aláá-ε sé ngáne nyénwōgkē pél áyāle ndutul eche ebédé nyé á nlém-tê ngáne nyénkênwógédtē με menyinĕge. Anláá-ε με ngáne nyéwóo nlém áte ábé με ámbíd. Ade Tituse álángé sé nímén mekan, membé menyinĕge bwâmbwam.

⁸ Kénέε édíí bán ene kálag echĕ mēntelεé nyé enwógéd nyé ndutul, meésáá ngol nén με nténlé nyé chó. Kénέε édíí bán membé ngol atel áde mēntenlé chó, nnyíné nén μεέ echem kálag echĕ ríténlé nyé ewiidé nyé nê á esón é póndé. ⁹ Boŋ bōab ndé menyinĕge, saké áyāle ménwōgēdtē nyé ndutul, boŋ áyāle ndutul eche nyénwōgkē ebélé nyéhǎŋléné áden abé dé mbéb nyēbele' ngáne Dyōb áhedεé. Nyénwóg ndutul ngáne Dyōb áhédé'áá aá nyéwóg. Né-ōó, ndutul ké ehéé echĕ sēmbenlé boŋ nyéwóg, enkēmbébénné nyé. ¹⁰ Nzé ndutul edé mod á nlém-tê ngáne

Dyōb áhedeé, ane mod abelé ahənlén áde abé dé mbéb ábelé' ngáne Dyōb áhedeé. Nén ábele' ane mod ákūd e'soosə, nê déewiidéé modmod ámpē. Boŋ bad ábe bédúbpé Dyōb, ndutul echē edé bó á nlém-tê áyāle bédíí baányosə ebelé' bəwág á edəədəŋ. ¹¹ Boŋ ndutul embé nyé á nlém-tê ngáne Dyōb áhedeé aá ébê. Né-óó, nyénəne' chōm éche nê ápíínédé nyé. Nyēhedé'áá bán mbii nén mēé nyēwane áte álúmed bad nén bán nyéēbēlēē awusé ké ahóg bəəb. Meliŋgá mémbe nyé áte nén bán ábē bad bēbélé awusé á etūn é pónde nyédé ahób bán nyēlāŋge bó bán bésog mbéb abel. Nyēnwóg mbwóg nén bán Dyōb dékəgsən nyé nzé nyédé nyēbele échén ndín é mekan. Nyēndəŋ me anyín bwāmbwam, nyēnwosə nlém ábē me ámbíd, nyékəgsān-ne bad ábe bēbele mbéb. Abel áde nyébélé mímén mésyāāl, álúmté sé nén bán nyéēbēlēē mekan mé mbéb. ¹² Né-óó, kénéé rítélé ene kálag, menkēntenlé chó áyāle mod awē abelé epandé ké'ε mod awē bépánné boŋ ntelé chó ábel boŋ nyébii á'sō é' Dyōb nén bán nyékoó sé adəŋ. ¹³ Nê dōó ákóó boŋ nyéwēdē sé nlém á abum.

Saá-kaá e'wéd bé nlém á abum bēnpən, boŋ sēmbé menyiŋge bwāmbwam anyín áde sennyinnē Tituse adé menyiŋge áde ápédé. Anlāá sé ngáne nyébélé boŋ asóg atag áte. ¹⁴ Membé kúmbē álāa Tituse ngáne nyédíí bad bé bwām, nyēnkēnwógéd-taá me e'son áyāle nyēnlúméd nén bán mekan míme ménlāā'é mó médé mbále, ngáne mekan mésyāāl míme sénlāā'é nyé médíí mbále. ¹⁵ Nê ábélé míme nlém rítimé' áwēn tómaa ké ngen e'só, akamtən áde ákamtanné ngáne nyé moosyāál nyēnwōŋgē nlém ábel mekan míme

ánlāā' é nyé aá nyébel. Nlém rítme mó áwēn ámpē nzé akāmténé ngáne nyênkobpé mó ne edúbé, nyéwóngén-ne mó ne nlém nhóg. ¹⁶ Ndé menyinge áyāle nsumé nlém nsyāā́l áwēn.

8

Bad bé Kristo bétāngéné bad ábe bétógnéné awōngēn

¹ Bōōb-pōō a-baányan, sēhede bán nyébíi nén bán Dyōb ábágé nímē nsimé wéε bad bé Dyōb ábe bédé á mwembé níme rídé á mbwóg e Masēdonia ábel bon bésále ekáá áte. ² Békúdé metake mé ngíne níme mékəge bó áte bwāmbwam. Kénéé édíi bán bédé atóg bwāmbwam, bésánlé ekáá áte bwāmbwam, bédé-'ε menyinge. ³ Ndé mbōn nén mēé, bēmbě chōm éche bēnwōngē, bēntōmtēn-ne abε tómaa chōm éche bēmbēε bēbage'. Bébágé'áá-'ε ngáne nlém nímāb ménlāā' é bó. ⁴ Bēnchān syánē bwāmbwam ábé menyinge áwōngēn bad bé Dyōb bé Jerusalem ngáne bómpé bēbeléé. ⁵ Bēmbě́l tómaa ngáne sēnwēmtēnnē. Bēnsēbē ádāb alongé abε á mekáá níme Sāngwéé. Ambīd enē bēmbě́ ádāb alongé áwēd mekáá ngáne Dyōb áhedeé aá bēbel. ⁶ Né-ōó, sēcháa' Tituse awē ambootéd nímén nsón ne nyé nén bán ádíi áwōngan nyé, nímén nsón níme nyésánlé ekáá áte, nyébāgē-'ε bad kéchéé éche bétógnéné ne nlém nhóg, nyépid mó á asóg. ⁷ Bōōb-pōō, nyēbele bwām á menzii mésyāā́l. Adúbe áwúú nyé áte. Nyékale' nkalan mí bwām, nyébíi mekan mé Dyōb, nyéwóó nlém áwōngēn bad nyédāá-'ε sé bwāmbwam. Né-ōó,

sêhede bán nyébele bwâm, kááŋne âsale ekáá áte, nyébage-’ε bad kéchéé éche bétógnéné.

⁸ Meekamlánné nyé ábel nén. Bonŋ ngáne rínyíné bad ábe bédúbpé béwōŋgan bad bémpēe, nhede mēé nyémpē nyélúmed ngáne nyédáá bad bémpēe. ⁹ Nyêbíí ngáne eched Sány, Yesu Krístəə áwōŋganné nyé âsale ekáá áte. Kéchéé éche Dyōb áwóó mó awóó. Bonŋ kénê á etútú échēn antedé nímē nhən rísyāəl ádyōb ápē á nkōŋsé abé nēe ntógétōke ní mod. Ambēl nê ábel bonŋ nyékud nnam míme Dyōb ábageé bad.

¹⁰ Mbage nyé elébé nén mēé, mwē míme rítómé nyêmbé bad bé e’só áwōŋ nlem áwōŋgen bad, nyêmbé-’ε bad bé e’só ábooted bad awōŋgen.

¹¹ Bəəb-pəó, nyétāŋgéné nsón míme nyébóótédé amad. Nê débēl bad bēbíí nén bán nyédé mbonŋén ábe ngáne nyéwóó ápid-te nê á asóg melemlen ngáne nyêmbonŋénné ábooted nê. ¹² Nzé ewóó nímē nlem ábe mod chōm ngáne éwóó chó, ébelé ékōbnéd ne Dyōb. Dyōb déehedéé aá mod ábe tómaa chōm éche áwóó.

¹³ Meehábéé mēé nwōŋgen míme nyébageé bad ríwōŋgen bó bonŋ nyé bēn nyébê á metake-té, bonŋ nhede mēé nyé moosyāəl melemlen, nyéwōŋ chōm éche ékwógnédé nyé mod-téé. ¹⁴ Bəəb-pəó abud áde nyébúdé bwēm awōŋ, nyéwōŋgan bad ábe bédíí bēhede’, ábel bonŋ á póndé eche nyémpē nyétōgnēnnē bómpē béwōŋgēn nyé. Nê débēl mod téé áwōŋ. ¹⁵ Eténlédé á kálag e Dyōb nén bán, “Mod awē ambud awōŋ, enkēnwōŋgé tómaa ngáne ántōgnēnnē, awe mó-’ε enkēmbud awōŋ, andíí anwōŋ ngáne ántōgnēnnē.”

Bélómé Tituse bó á Kōrinto

¹⁶ Nságnan Dyōb abε áde ábágé Tituse ámpē nlem áwōngēn nyé melemlem ngáne ábágé με.

¹⁷ Tituse eépāgkē áwēn áyāle sélāngē mó bán apε, bon apag káōn ne áyāle awóó nímé nlem áπε, apag áyāle mwēn adáá apε. ¹⁸ Sélómne mó mwānned a Krīsto ampée. Anén mwānned a Krīsto, abyééné átíntē e mwembé nsyāal akal áde ákalée nkalanj ní bwām. ¹⁹ Saké alóm áde sélóméé mó dēmpen, mwembé mēmpwēd mó áhoon sé ngáne sébελέé nsón áwōngēn bad ábel bon edúbé éche Sāngwéeé ényínned ne álúmed nén bán sēwóó nímé nlem áwōngēn bó.

²⁰ Séēhēdēē bán modmod áhōb dyam dé mbéb tēngene nímén nsón mé asále dé ekáá áte níme sébελέé. ²¹ Sēwóó nlem ábel dyam áde átēngéné saké á'sō ábe Sāngwéeé dēmpen bon káōjne á'sō é' baányonj.

²² Sélóme' mwānned a Krīsto áwēn nchoo ne Tituse bó. Alúmté sé á menzii híin aá mōwōō nlem áte áwōngēn nyé. Bōob-πε áde ályágé nlem áwēn, anābpé nlem awónj áwōngēn nyé. ²³ Tituse mó ne mó ayōgké με ahoon ábel nsón áwōngēn nyé. Abíníí bānned bé Krīsto ábe békag ne Tituse bédii bad ábe mwembé mélómé á dīn ádāb, kéhée-'ε wéeé békíí mam níme bébελέé mépiinad Krīstəə edúbé. ²⁴ Né-óó, nyélúmed ábén bad nén bán nyēdəó bó. Abel áde nyéβenlé nē, mwembé níme nílómé bó mēsōntēn nén bán nén dōó ákás bon sékumné nyé ekáá á tēl.

9

Békag bad bé Krīsto bé

Jerusalem mōné asarjed

¹ Βοῶb-πῶό, éesaá etógnén με átele nyé t̄ngene nsón míme séwōnganné bad bé Dyōb. ² Mbíi nlém míme nyéwóó áte áwōngεν bó, mbééné-’ε nyé kúmbe awōη áde nyéwóó nlém áwōngεν bad ábe bédé á mbwóg e Masedonia. Menláá bó nén μεέ, “Nyé ábe nyédé á mbwóg e Akaya, nyêmbé mboηsén se mpú-mwě áβε bó mōné.” Nlém míme nyéwóó áwōngεν bad rítédé bó bad híin nlém á abum ábel melemlem. ³ Βοῶb-πῶό, nlóme’ ábén bānned bé Krīsto áwēn, ábel boη ahób áde séhóbéé bán sêkumne nyé ekáá á t̄l déēbāg bán sêkale metóm. Boη ébē bán ngáne r̄lángé bó μεέ nyéēbē mboηsén áβε bó mōné, nyéēbē-’ε nê dēn. ⁴ Né-ῶó, nzé mpedé áde bad bé Masedonia bépédé ne με boη ntáné nyé áde nyéēboηsενεέ, séēkwāg bwāmbwam, nyé-’ε ámpē nyékwāg. ⁵ Né-ῶó, nê d̄ῶó ákás boη r̄d̄ōl áte nén μεέ édé etógnén álóm ábed bānned bé Krīsto á’sō, ábel nyémad nwōngεν míme r̄chábé ám̄in míme nyéhóbé bán nyéēβε bó, aboηsen. Nzé nyēbelé nê, né nwōngεν r̄syāāl mébē mboηsén nzé mpedé. Nén délūmēd nén bán nyébage ne nlém nhóg saké áyāle sényágté nyé.

⁶ Nyébii nén bán mod awě eébude awén, eébudté ahúd, awe mós-’ε abudé awén ábūd-te ahúd. ⁷ Nyé mod té áβε mōné ngáne míme nlém r̄lángé mós. Mod éēbāgē sé nlém r̄k̄oglád mós á abum ké’ε ébé byánán bényágté mod. Dyōb adáá mod awě abage ne e’sán bé nlém. ⁸ Dyōb déβε nyé kéchéé éche nyétógnéné abel boη nyéwōη chōm ésyāāl éche ékwógnédé nyé ásále ekaá áte áβε bad bémpeē. Nén débēl nyéēbude’ bad mekan mé bwām abele. ⁹ Eténlédé á kálag e Dyōb nén bán,

“Asánlé ekáá áte ábe betóótōkē bé bad nwōηgen, bad béechaténné ábē e’boη bé nlém.”

¹⁰ Dyōb dōo ábage bad bwēm ábe béwénéε, ábage-’ε bad chōm éche bédyákē. Abε nyé bwēm ésyāāl ábe nyétógnéné áwén, ábēl é’kwōg é’chyáá mbote eche ebuú áte bwāmbwam. Abel nén áyāl e e’boη bé nlém ábe nyéwóo. ¹¹ Dyōb débēl nyébé nhōn áyāl e chōm ésyāāl, ábel boη nyésále ekáá áte. Nén débēl bad híin básagnēn Dyōb áyāle nwōηgen míme nyébageé bó míme ríhúú ne sé. ¹² Abel áde nyébeleé nén, déesaá áwōηgen bad bé Dyōb dēmpen, boη áde káēηne álúmed bán bad híin básagnan Dyōb bwāmbwam. ¹³ Mekan míme mímén nsón míme nyébeleé nén mébidēdte áwed, mébēl bad híin bébage Dyōb edúbé áyāle nyébele ngáne nkalanj ní bwām míme Krīstāā ríhóβεé, nyélūmtē-’ε ábēn e’boη bé nlém wéε bad bé Dyōb ábe bédé á Jerusalem, nyélūmtē-’ε wéε bad bé Dyōb bēmpēe. ¹⁴ Béwóo nlém ányín nyé, békānnād-te nyé áyāle nsimé ní Dyōb rídé ne nyé. Mmē nsimé ríchábé ámīn bwāmbwam. ¹⁵ Nságnen mbē ne Dyōb áyāle abagé syánē nsimé míme rílélé ahəgten.

10

*Paale aláηgé bad bé Kōrinto
ad mīmē nsón rítāηgéné*

¹ Mε Paale, με awē mpwiítédé nsudte-’ε yāl nēηgáne Krīstāā, ncháa nyé. Baahóg béhóbe’ nén bán nzé ndé ne nyé mbelélé ríwógé mbwóg. Bán boη nzé meésé ne nyé, mbelélé rítenlé nyé kálag éche éwúú áte. ² Ncháa nyé nén μεé nyéébēlē’ ngáne ábē bad bébeleé ábel boη nzé mpedé áwēn, ríhóben nyé ésebán mbáa’ dyamdyam. Bad ábe

méhōbēnnē bédii bad ábe béhōbe bán sēbele nsón ngáne bad bé nkōhsé bébeléé. ³ Kénéé édii bán sēdé á nkōhsé-te, séēwānēē nzum ngáne bad bé nkōhsé béwanéé. ⁴ Bwēm ábe séwannéé nzum béesaá melelem ngáne ábe bad bé nkōhsé béwannéé. Boŋ bwēm é' nzum é' ngine é' Dyōb bōo sébenladté ábébed mebwóg mé ngine níme ábēd bad bé ekoyí. Abén bwēm é' nzum bōo sébenladté ásuded mpentēn ké ríhée níme bad bēpēenēé níme méesē mbále. ⁵ Sébenlad bó ámpē ámad mehób mé kúmbe níme béhōbéé níme mébele' boŋ bad béēbyē' Dyōb. Sébele' bad béhōjan nímad mewēmtēn ábel nímad mewēmtēn mésyāāl mébē nyaa éche Krīstā áhēdēé aá mébē. ⁶ A pónde échē nyébenlé ngáne Krīstā áhēdēé ne nlém nīsyāāl, dōo sébohsénnē ákōgsēn kénzēé awē alúmté aá móobenlé ngáne Krīstā áhēdēé.

⁷ Nyénōne' chōm éche édé nyé á'sō-te. Mod ké ahée awē asumé nlém ne Krīstā ábii aá ngáne módii, nē dōo sémpē sédii ne Krīstā. ⁸ Ké menkūm ké ekáá á tál áyāle ngine eche Sāngwéé ábágé me tómaa ngáne níkuméé bōob, méewógké e'sōn. Abagé me ene ngine áwéd nyé áte saké ásuded nyé adúbe. ⁹ Meéhēdēē méé ényīned nén bán kálag éche rítenléé nyé édii áwóged nyé mbwóg. ¹⁰ Nhóbe nén áyāle bad béhōbe bán kálag éche rítenléé nyé éwúú áte, éwóó'-ε, e'yale bé mbéb áte. Béhōbe'-ε ámpē bán boŋ nzé mmēn ndé, meewóó'ε ngine, kéchéé éche ríhōbéé'-ε éewóó'ε ngine ké póg. ¹¹ Bad ábe béhōbe nē bēbii nén bán kéchéé éche rítélé á kálag, nzé meésē ne nyé, mēbel chó nzé ndé ne nyé.

¹² Séēhēlēē-se sēhób mbēd bán sēhāgtan yāl, ké'ε sé bán sēdé nyaa póg ne bad ábe béhōbe'

mekan mé bwâm áyāl echâb. Boŋ ngáne bèn ne bèn béhəgtanné yāl, béhəbē-’ε bán bèn ne bèn bétómné, bédé eyókéł. ¹³ Boŋ sé pɛn séékūmēē ekáá á tâl tómaa ngáne sétəŋgéné akum. Hǒm áde Dyöb álómé sé aá sébel nsón dɔɔ sébéenēé kúmbe. Nsón míme sébelēé átíntē echên mómpeé nídé nsón míme sébéenēé kúmbe. ¹⁴ Séékūmēē ekáá á tâl ábel nsón hǒm áde Dyöb dénkhnlómmé sé nsón abel. Sé-’aá sébédé bad bé’sō ábíd nchabnede áhye dé akale nyé nkalanj mí bwâm míme Krístaa. ¹⁵ Séékūmēē ekáá á tâl tómaa ngáne sétəŋgéné akum, nédē séékūmēē ekáá á tâl áyāl e nsón míme bad bémpeé bébélé. Boŋ pɛn sésumé nlém nén bán ngáne áden adúbe ákwogéé, nê dɔɔ nsón míme sébelēé mékwogéé bwāmbwam mebwóg míme sébelēé nsón. ¹⁶ Nén débël séēkäg mebwóg mémpēe míme méchábnédé, sékale’ Nkalanj mí bwâm, ésebán sékume’ ekáá á tâl áyāle nsón míme bad bémpeé bébélé mebwóg mémpēe.

¹⁷ Éténlédé á kálag e Dyöb nén bán, “Kénzée awě akume’ ekáá á tâl, atəŋgéné akum ekáá á tâl, áyāle chǒm éche Səŋgwéé ábénlé mó.” ¹⁸ Saké ahób áde mod áhóbéé yāl mekan mé bwâm á yāl dɔɔ álúmte’ bán aköbnédé née mbapɛɛ a nlomag, boŋ mod a mbále awě Dyöb áhóbéé mekan mé bwâm á yāl mó adé mod awě aköbnédé.

11

Paale ne bembapɛɛ bé nlomag bé metóm

¹ Ncháa nyé nén méé nyémwe ílāa nyé mwă a akan ké nnyínnéd ké eyókéł. Nyébân metúu.

² Nsíide’ nyé nyaa echě Dyöb áhele ásíí nyé. Nyêdii

nēngáne ngən e mmwaád echē eebíí mwENCHÓM. Ane mmwaád mós rhóbé mēé mod nhóg āwōη, ane mod adíi-’ε Yesu Krīstə. ³ Bon ké nē, ndé mbwóg nén mēé ngáne Satanε āmpongé Ifε nló áte ne mímē mwane, melelem nē dós bépongé nyémpē nló áte nyaa echē nyéesummé mímEN nLÉM rīsyāāl ámpē wēε Yesu Krīstə nyéebelée-’ε mó ne nLÉM rīsyāāl. ⁴ Nhóbe nén áyāle nzé mod apedé bon akānlé nyé nkalan mīme méesē nkalan mīme Yesuε mīme sēnkaléé nyé, nyēbelé nyésēbēn mó tāl. Ké-’ε nzé akānlé nyé tāηENE edəádəη éche éesē edəádəη éche sēnkaléé nyé, nyēbelé nyékob. Ké-’ε nzé mod akānlé nyé nkalan mī bwām mīme méesē nkalan mī bwām mīme sékánlé nyé, nyēbelé nyékōbēn mó mekáá méε.

⁵ Meedúbpeé mēé ábén bad ábe béchágé yāl bán bédé bembapεε bé nlomag bémbáá bétómé mε áyāl e nsón mīme bébeléé, nzé nhəgténé syāābō. ⁶ Nhele se meebyéé’ dyam ahób átínté e bad ngáne béhóbεé, bon nwóó nsōηTEN tāηENE dyam áde rhóbεé. Sékélūmēd nyé mímÉN mekan áte híin mīme sébeléé.

⁷ Ade ríkánlé’áá nyé nkalan mī bwām mīme ríhúú ne Dyōb, menkēnhóbpé mēé nyésábe mε. Mensudéd echem yāl ábel bon nyéwōη edúbé. Ade mēmbenlé nén, dyam dé mbéb dós mēmbenlé-ye? ⁸ Mběnlé’áá nyé, mwembé mémpēε mēsābpē mε, né-óó, ébédεε byánán ndoge’ mímē mwembé āwōηEN nyé. ⁹ Ade mémbeε-’ε ne nyé donge á pónde meewóo’áá chōmchōm bon meétagte’áá nyé, áyāle kéchéé éche méntōgnēnnē ábēm baányan bé Krīsto ábe bémbíd á MasEDONIA bébáge’áá mε. Ngáne ménkēntagédté nyé ngen

e'só, méetagéd-taá nyé pónde ké póg. ¹⁰ Ngáne níkaléé mbále née mod a Krísto, modmod á mbwóg e Akaya eéhēē-se ábēl se nsóg ekáá akum á tâl akob áde méekobéé nsábe áwēn. ¹¹ Nyêwémténé bán ahób áde níhóbé méé méetagédte nyé ákob chõm áwēn adíi áyāle méedəə'é nyé-yé? Dyõb ábíí aá ndəá nyé.

¹² Adén akan áde níbeléé bəəb, məbē níbelé dó, ábel boŋ méebāgē bembapēé bé nlomag bé metóm etál áwōŋ nzom ákum ekáá á tâl áhób nén bán bébele nsón melemlen ngáne sémpē sébeléé.

¹³ Echē ndín é bad éche ékume' ekáá á tâl, bédíi bembapēé bé nlomag bé metóm. Bédoge bad áyāl e nsón níme bébeléé, alúmed áde bélúmtéé yāl byánán bédíi bembapēé bé nlomag ábe Krístəə.

¹⁴ Nén déekōmtēē mə yāl áte, áyāle nén ké Satané mómpē alúmté yāl byánán adíi ángel e Dyõb echē esáá. ¹⁵ Né-óó, éesaá mə menyáké nzé bembəledé ábe Satané bómpe bélúmté yāl byánán bédíi bembəledé ábe báyágte' bad ábel mekan níme métəŋgéné ngáne Dyõb áhədəé. Káəŋne á asóg, nkógsen níme békudté métəŋgēn nímāb mbeltéd.

*Metake níme Paalé ákúdé
née Mbapēé a nlomag*

¹⁶ Nhóbe ámpē nén məé, modmod eewémtán aá ndé eyókéł. Boŋ nzé nyêwémténé bán ndé eyókéł, nyéwóg-kóó chõm éche nílangéé nyé ábel boŋ mémpē níkum ekáá á tâl mwāmpīn. ¹⁷ Kéchéé éche níhóbéé bəəb éesaá chõm éche Sāŋgwéé áhóbé aá níhób. Nzé nkume' ekáá á tâl áhób kéchéé bəəb, né nhóbe nēŋgáne eyókéł é mod. ¹⁸ Ngáne édíí bán bad híin békume ekáá á tâl née bad bé nkõŋsé,

měmpē mǎbĭl melemlēm. ¹⁹ Nyébĕn nyêhóbēé bán debýéé dĕn-éé nyékúdé, nê ábélé nyékobe ne menýiŋge kéchéé éche e'yókél é' bad éhóbēé. ²⁰ Ké mod átímté' nyé nĕŋgáne ntân, ké ádyāg nyé bwĕm áyāl, ké'ε ádogé nyé, ké'ε áchāgtē yāl ámĭn, ké'ε ábōm nyé abĕn á'sō, nyékobe mó. ²¹ Akwágké ákóbe mē nĕn, sĕnkĕnwōŋgé ene ndĭn e nlēm ábĕl nyé échē ndĭn é mekan á yāl.

Nhóbe bōōb nĕŋgáne eyókél é mod. Mǎbĕ kúmbe, ríkumé-'ε ekáá á tâl áyāl e mekan níme mbĕlĕé melemlēm nĕŋgáne bembapēε bé nlomag bé metóm bébĕlĕé. ²² Bĕlāŋgé nyé bán bédĭi bad bé Hibru bĕn, mēmpē ndĭi mod a Hibru. Béhóbé bán bédĭi bad bé Israel, mod a Israel móō mēmpē rĭdĭi. Béhóbe bán bédĭi bad bé mbyaa níme Abrahame, mod a mbyaa níme Abrahame móō mēmpē rĭdĭi. ²³ Béhóbé bán bédĭi bembāledε ábe Yesu Krĭstā, mēmpē nlāŋge nyé mēé mbĕlé nsón tómaa bó. Nhóbe' bōōb nĕŋgáne mod awĕ nló méēsáá'ε áte. Mbĕlé ntŭ rĭ ngĭne tómaa bó, nkĕnkĕ á mbwōg ngen ne ngen tómaa bó, nkĕnkŭd mbĕte é ngĭne tómaa bó, nkĕmbĕ-'ε á nsəl rĭ soŋ ngen ne ngen tómaa bó. ²⁴ Bad bé Israel békébōm mē e'tanǵú móom mĕláán ne abog, ngen étáan. ²⁵ Bad bé Roma békébōmĕn mē ntōŋ ngen éláán. Ngen pōg bad bēmpēε békébōmĕn mē meláá kóŋj bēpōn mē awúu. Stĭma ékékunnéd sé á edĭb é nkwĕ-te ngen eláán. Póndé pōg nhóó'áá á edĭb é nkwĕ, nĕn dĕmbĕnléd áyāl e epun ehóg ésyāāl, nkuu ne mŭte. ²⁶ Nkĕnkĕ meke bwāmbwam. Á meke-tĕ wĕ, e'dĭb é'képōn mē ahóod. Mponé alongé abód á mekáá mé bechĭb, á mekáá níme ábĕm bad bé Israel ne á mekáá níme bad ábe béesĕ bad bé Israel. Mponé

alongé abód á dyad á mbáá, n̄pōn alongé abód á ehyánge, n̄pōn alongé abód á edīb é nkwě te, n̄pōn-ne alongé abód á mekáá mé bad ábe béhóbe bán bédé bad bé Kr̄sto áde béesaá. ²⁷ Mbelé ntũ ní ngíne, nnǎngé epin ngen ne ngen. Donje á pónde meewóo'aá chõm éche ndyágkē ké'ε ké chõm éche n̄mwágkē, meéyǝgke'aá-'ε pónde awón̄ ádyé ndyééd. Donje á pónde ahéb ábágáá me á yǎl bwâmbwam meewóo'aá-'ε chõm éche nhágkē á yǎl. ²⁸ Amin e n̄m̄én mésyā̄l, nwóó n̄m̄é n̄lém áte mbwε-té ân̄on mwembé n̄syā̄l n̄me n̄idé ásē echēm bwām. ²⁹ Nzé mod eewúu áte áyāl e mekan mé Dyõb, mbelé nwóg yǎl áte melemlem ngáne móm̄pē áwógéé. Nzé bebélté mod mbéb, mbelé nwóg ndutul bwâmbwam.

³⁰ Nzé n̄tǎngéné ekáá akum á tâl, né chõm éche n̄tǎngéné ekáá akum̄en á tâl édii mekan n̄me mébele' bon̄ bad bényín me n̄h̄ngáne mod awě eewóo ngíne. ³¹ Dyõb, Sáá awě Sǎngú Yesue, abíi áá meékālēē metóm. Mek̄enag mébê ne mó á ngíndé ne á ngíndé. ³² Ade mbédé á dyad á Damaskos, nkamlene awě ambé ásē e k̄h̄ Ar̄etase ambané sánze ân̄on nsal mé e'ké ní dyad n̄syā̄l ábel bon̄ békób me. ³³ Bad bēnhē me á elón̄-té, bebíded me á wínde echē ebédé á eséd éche ênl̄h̄ned dyad, bēsūdēd me á nd̄oob, d̄oó n̄nyágté bon̄ nk̄ē-'ε.

12

Dyõb álúmté Paale mekan á ndóg-te

¹ Měbē níkumé ekáá á tâl. Kénéé édii bán nē déewōngānnē. Bon̄ mẽkě á'sō áláa nyé t̄h̄ngene ndóg éche n̄nyíné ne mekan n̄me Sǎngwéé álúmté me. ² Mbíi dyam áde dēmbenléd ne mod awě

adúbpé Krístæa nhóg. Dyôm á mwě ne níniin áde átómé ámbíd, Dyõb dênsoḡ mó ákēēn mó ádyõb á ndágke echě etómténé achab ámīn. Meebii'é ké ankě áwed á ekob é yǎl ké'ε á edáádəŋ, Dyõb dṵó ábíí. ³ Mbíí-'ε chõm éche ébénlédé ane mod áwed, kénéε méébíí'é ké á ekob é yǎl dṵó ábédé ké'ε á edáádəŋ, Dyõb dṵó ábíí. ⁴ Krístæa ansog mó, ákēēn mó á Paradis. Ahed Dyõb dénllāā mó mekan níme éemwagké aá moonyon a ekob é yǎl áhâb wéε bad bémpēe. ⁵ Ayāl e ene ndín e mod dṵó mékummé ekáá á tâl saké áyāl echēm chēn. Chõm éche mékuménné ekáá á tâl édíi mekan níme mélûmte' bán nwóó yǎl e moonyon. ⁶ Boŋ ké mendəŋ ké ekáá akum á tâl, méenyínédte nēε eyókél é mod áyāle mbále chṵó mékanlé. Méekuménné échē ndín é mekan ekáá á tâl âbel boŋ nyéēbāgē me edúbé áyāle échē ndín é mekan. Boŋ pen ndáá meé nyétéd me ngáne nídíi áyāl e mekan níme níbeléé ne níme ní'yágtéé nyé. ⁷ Boŋ âbel boŋ meebág kúmbe áyāl e nímmē mekan mé menyáké níme Dyõb álúmté me, boŋ ábēl-le nwóg, Dyõb dēmběl aá níwõŋ nkole á yǎl níme níbélé'áá me níwógé e'wε bwámbwam. Mmén nkole níbédéε nēε mēsénze níme Satane álómé âtaged me âbel boŋ meebág kúmbe. ⁸ Nkánné wéε Sánḡwéé ngen éláán, nícháā mó meé ákobēn me nímmén metake. ⁹ Boŋ chõm éche ánlāā'é me ébédéε aá, "Nsimé níme níbágé wε níkwógé wε. Nwédé wε áte nyaa echě étóméé metake mésyāāl áte níme éwóó. Ayāle á pónde echě ngine éēbāgkē mod áte dṵó echem ngine éwõŋganné mó áwéd mó áte." Bṵṵb-pṵṵ, mébē menyinḡe ákum ekáá á tâl áyāl e mekan níme mélûmte' bán ndíi moonyon a ekob, âbel boŋ bad

bényín nén bán ngíne echě Krīstə́ édé με áte, chό-
'aá ewéde με áte. ¹⁰ Né-ᾠ, á yǎl e Krīsto, mbélé
mbé menyinje ké áde méewúu'έ áte, ké áde bad
bésyáá'έ με, ké áde mekan mélénlédé με áte, ké
áde bad bétagtεέ με ké'ε áde ndíí á ndutul tē.
Nhóbe nén áyāle pónde ké ehée áde méewóó'έ
ngíne, Krīstə́ abelé ábē με ngíne.

Paale atōhtan mwembé níme rídé á Kōrinto

¹¹ Nhóbe née eyókél é mod bon nyéē nyékə́á bon
ríhōbē nē. Nyēmbé née nyéhóbeé με mekan mé
bwām áyāl. Ké émbē bán meésaá dyam, bon
pen bad ábe nyéchə́gεέ bán bembapεε bé nlómag
bémbáá, béētóméé με áyāl e chómchóm. ¹² Ade
níbédé ne nyé, menwεsén álúmed nyé e'chemléd
ne ábel menyáké mé ngíne álúmed nén bán ndii
mbapεε a nlómag awě Dyōb álómé. ¹³ Etóméé
abele áde níbénlé nyé bon meékwentene méé
nyésábe με, nyéláa με nyaa empée echě rítédé
bad bé mwembé níminíí μεé bédé με etógnén
tómaa nyé. Nzé édé nén bán nē ádé awusé,
nyélagsén με.

¹⁴ Bᾠb ndé mbonjsén ápe áwēn ngen éche
élónténé éláán bon pen méetagédté nyé.
Méepāgkē ábel bon nyébage με bwēm bon
nyébēn-εé nyékə́á bon nípag. Nyétāngéné abii
nén bán besáá ne benyaá bé bán bᾠo bétāngéné
ábab bán atōgen saké bán bétagné benyaá ne
besáá. ¹⁵ Měbē menyinje ábenled kéchéé éche
níwóó káōne yǎl echēm, áwōngēn nyé. Nzé ndáá
nyé bwāmbwam, nédē nyémpē nyéetāngēneé
με adəŋ bwāmbwam-ε? ¹⁶ Nyébēn nyébíí nén
bán menkēntagédté nyé, bon mod ampée ahóbé

aá membé akwáb, ndogné-'ε nyé metóm. ¹⁷ Chán mēndogké nyé? Bad ábe ménlōmmē áwēn menláá bó mée bédog nyé-yε? ¹⁸ Menchán Tituse mée ápe áwēn, nlómén-ne mó aníní mwānned á Krīsto. Nédē nyéēhāb bán áde Tituse ápédé áwēn, andog nyé-yε? Eesaá mbále nēn bán sé Titus sēwóó mewēmtēn mehóg-ε?

¹⁹ Kapóg enén pónde esyāól nyēwēmtan bán sēhede échēd yāl nzōm asuud ahób áde séhóbéé bán sēkánlé nyé mbále. Eesaá nē, kéchéé éche sélāngéé nyé sélānge nyé chó née bad ábe Krīstā ályágtéé, Dyōb-pe áwóge' chōm éche séhóbéé. Abaányan bé edānge, kéchéé éche sébeleé, sébele chó áwéd nyé áte. ²⁰ Mbáa' nēn mée áde mépéé áwēn mētān née nyébeleé mekan míme méedā'é, mε-'ε ámpē mēbel mekan míme nyéedāngé. Mbáa' nēn mée áde mépéé, métān ngáne nyébēn ne bēn nyésēnléé, nyésiīdēé nhóg ne aníní, nyéliηnéé nhóg ne aníní, née nyéedā'é bán mod ampée awōη edúbé, née nyésyāηnéé, nyéhóbéé nhóg ne aníní ámbīd, née nyédíí kúmbe, née nyébeleé-'ε mam mé epuutéd. ²¹ Mbáa' nēn mée áde mépéé áwēn ámpē, Dyōb déwōgēd mε e'sōn áwēn é'sō. Mēsudēn-ne áyāle bad hīin átintē echēn bédíí bébele' mekan mé mbéb míme bēbélé'áá bōób, ésebán bēhāηlan ádab abé dé mbéb ábel ngáne Dyōb áhēdēé. Bébele' mekan mé mbinde, békábe mesón, bébele-'ε mekan míme mbinde míme méwógte bó e'sōn.

13

Paale abagé elébé é asóg

¹ Nēn délōntēn ngen éláán áde nípagké áwēn. Eténlédé á kálag e Dyōb nēn bán, “Nzé békáadte

mod bétāngéné awóg wée mbónj ébe ké'ε élaán.”
 2 Ade mēmpēé awēn ngen éche énlōntēn ébe, menláá nyé mēé mékōgsēn bad ábe bēbele' mbéb átintē echēn. Ndii nlānge-'ε bó bōob, nlānge-'ε bad bēmpēe ábe bōmpē bēbele' mbéb, ké bōob áde méesaá ne nyé. Ade mēpēé ámpē, méewógké modmod ngól. 3 Ene pónde dōo nyébī'ε bán kéchéé éche ríhóbéé éhuú ne Krīstā. Eesaá nēn bán Krīstā eewú'ε áte áyāl e chōm ésyāāl eche ábeléé, bonj alūmte' eche ngine átintē echēn. 4 Edé mbále nēn bán Krīstā nēngáne moonyon, enkēnwóngé ngine áde bēmboméé mó á awóg. Bonj kēnē, adé á alongé bōob, áyāle Dyōb dēmbenléd eche ngine ábane mó á alongé ámpē. Abé áde sēdii mod nhóg ne Krīstā, sēmpē nēngáne baányonj séewú'ε áte. Bonj sēmpē séēbē á alongé ne Krīstā á ngine e Dyōb, sébēlē-'ε nyé chōm ésyāāl éche sétāngéné nyé abele.

5 Nyé mod téé mwēn átōn yāl asimēn, ábii ké alongé ádēn adé nēngáne alongé á bad ábe bédúbpé. Ndúbpé mēé nyé mod téé abii nēn aá Yesu Krīstā adé mó áte. Nzé nyé mod téé asimné yāl né nyébī nēn bán á mbále nyédé ne Krīstā. 6 Ndúbpé mēé nyēchemé nēn bán nsón míme sébeléé rílūmte nēn bán sēdii bembapēe bé nlomag bé mbále. 7 Sēkānne Dyōb nēn bán nyēbēlē' awusé ké ahóg. Séekānnéé nē abel bonj bad bényin bán sēdii bembapēe bé nlomag ábe bēbele mímab nsón bwám. Bonj pen, sēkānne' nēn bán, nyébele mekan nyaa echē etāngéné kēnéé édii bán donje á bad bēhōb bán séelūmteé chōmchōm éche élūmte' bán sēdii bembapēe bé nlomag ábe bēbele nsón bwám. 8 Edé nēn áyāle séēhēlē-ε

sébēl dyaṃdyaṃ áde átânḡan nkalaṅ ní bwâm ní mbále. Boṅ pēn chōm éche sébeléé édii áwōṅḡen bad ábii ne ábel ngáne nkalaṅ ní bwâm ríhóbéé. ⁹ Sébelé sébé menyiṅḡe nzé sēnyíné nyébele mekan míme mélúmte nēn bán adúbe áwúú nyé áte, ké sépen sēnyínnéd bán séewúú' é áte áyāle séenyinéé nzōm ké póg ákóḡsen nyé. Sêkânne' nēn bán Dyōb áwōṅḡen nyé nímmēn mbeltéd níbê bwâm ne abé dēn. ¹⁰ Nēn dōo ákóá boṅ nítelé' nímmēn mekan, kénéé édii bán meésaá ne nyé. Ntenle nyé ábel boṅ nzé mpedé áwēn meébēnlād ngíne eche Sánḡwéé ábágé me ákáne nyé áte. Kunze eche Sánḡwéé ábágé me édii ábel boṅ ríwōṅḡen nyé áwéd nyé áte saké ábel boṅ níbēnled chó ásuded nyé.

Melēnten mé asóg

¹¹ Asóged enén kálag, a-baányan, nyébê menyiṅḡe. Nlânḡe nyé meé nyéhāṅlēn, áden abé ábê bwâm ne abé dēn. Nheḡe meé nyéwōḡ échēm elébé. Nyéwōḡ mewēmtēn mehóg. Nyébê nsaṅ ne nhóg ne aníní. Nzé nyébelé nímmēn mekan mésyāā, Dyōb áde ábélé boṅ nyédān, nyébé-'e nsaṅ ne nhóg ne aníní, dénaméd nyé. ¹² Nyéhê nhóg ne aníní tâl á dīn á Yesu. Bad bé Dyōb bésyāāl bēlómme nyé melēnten.

¹³ Nkânne' nēn meé nsimé míme Sánḡú Yesu Krístā, edāṅḡe é Dyōb, ne nlatēn míme Edāádāṅ éche Esáá épēnēé, bēbê ne nyé.

Mel̥ Mékō̄lē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 29 Jan 2022

0143729f-907e-5098-b6ce-63b1629b8e48